

Pesilat Selangor kuasai gelanggang

B. Harlan (M)

Oleh MOHD RAHIME YUSOF

13 FEB 1990

PEMENANG pingat emas Dunia, Ahmad Fauzi Othman, terpaksa akur kehandalan Nasir Sanusi dari Johor bagi menempatkan diri ke separuh akhir Kelas E pada Kejuaraan Silat kebangsaan di Dewan Sivik Petaling Jaya, malam tadi.

Fauzi dari Gayong Malaysia gagal meneruskan perlawanan seawal pusingan ketiga dan meninggalkan gelanggang dengan kenangan pahit sebagai juara dunia.

Ini adalah kegagalan kedua di peringkat kebangsaan. Dua tahun lalu di Port Dickson, Fauzi dikecewakan pada separuh akhir.

Kecederaan lutut kiri Fauzi pada pusingan kedua dipergunakan oleh Nasir sebaiknya sebelum diisytiharkan menang TKO.

Sebelum itu pemenang pingat emas Sukan SEA XV, Ruzaidi Abdul Rahman (Selangor) semakin mantap dengan kerapian silat bagi mencatat kemenangan mudah ke atas Sani Yahya dari Kelantan.

Ruzaidi mempergunakan ketinggian sebagai senjata ampuh bagi melepaskan tendangan keras tepat ke sasaran membuat Sani kehilangan punca. Kemenangan itu meletakkan Ruzaidi selesa di separuh akhir dan peluang mempertahankan kejuaraan Kelas F buat kali ketiga berturut-turut cerah.

Pendatang baru, Zakaria Hamzah, melengkapkan sumpah Gayong Fatani merebut gelaran juara keseluruhan daripada Selangor, musim ini hampir menjadi kenyataan apabila 11 pesilat mereka menempah tiket ke suku akhir dan separuh akhir.

Keputusan:

LELAKI: Kelas A — Rusali Sari (GF) mn Firdaus (Sel); Kelas B — Azmi (Ter) mn Molly Jaiman (Sab); Kelas C — Shamsuddin Noor (Kel) mn Jaafar (Ter); Kelas D — Mohamad Faizal (GF) mn Shamsuddin Umar (Phg); Kelas E — Nasir Sainusi (Joh) mn Ahmad Fauzi Othman (GM); Kelas F — Ruzaidi Abdul Rahman (Sel) mn Sani Yahya (Kel); Kelas G — Nazri Samah (Lincak) mn Ahmad Arshad (NS); Kelas H — Zakaria Hamzah (GF) mn Noor Rahman (Pk); Kelas I — Mohamad Izan (Sel) mn Samsur Hamid (Mel). **WANITA:** Kelas A — Paramaznun (GF) mn Suryani (Pk).

■ Malaysia akan berusaha menyerapkan silat olahraga sebagai satu acara pada Sukan Komanwel apabila Kuala Lumpur menjadi tuan rumah sukan itu 1998 nanti.

Berikutan itu, Persekutuan Silat Kebangsaan Malaysia (Pesaka) akan menyusun rancangan bagi mengembangkan silat dan peraturan silat olahraga ke negara-negara Komanwel secepat mungkin.

Setiausaha Pesaka, Rahman Hassan, berkata hasrat murni Pesaka akan menjadi kenyataan jika mendapat sokongan kerajaan dan Majlis Sukan Negara.